

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni aallartitanut Siulittaasup aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanut nr. 1/2020-mut Inatsisartut tapersiinissaat pillugu Inatsisartut aalajangiiffigisassaattut siunnersuut:

Savalimmiuni, Kalaallit Nunaanni Islandimilu Naalakkersuisut nunani ataasiakkaani nunani avannarlerni suleqatigiinnermut naalakkersuisut aqutigalugit suleqatigiinnermik annertusaaqqullugit Nunat Avannarliit Killiit Siunnersuisoqatigiiffiannit kaammattorneqarput, matumani naalakkersuisut pineqartut minnerpaamik ukiumut ataasiarlutik, Nunat Avannarliit Killiit Siunnersuisoqatigiiffianni kaammattuutit aalajangersakkanik naalakkersuisunullu qinnuteqaatinik oqallisiginnillutik ataatsimiittarnissartik pillugu isumaqatigiissuteqarlutik, oqaloqatigiittarnikkut, isumassarsianik, ilisimasanik il.il. avitseqatigiittarnikkut suleqatigiinnermik siuarsaallutik.

(Aallartitat siulittaasuat Pipaluk Lynge-Rasmussen)

Tunngavilersuut

Nunani avannarlerni killerni naalakkersuisut kiisalu Nunat Avannarliit Killiit Siunnersuisoqatigiiffiat nunani avannarlerni suleqatigiinnermi nunat avannarliit killiit soqutigisaannik sulissutiginnittuupput. Nunat avannarliit killiit soqutigisaannik Naalakkersuisutigoortumik siuarsaanissaq kiisalu nunat avannarliit suleqatigiinneranni nunat avannarliit killiit soqutigisaannik ataqatigiissaarisuunissaq aallaqqaataaniilli siunertaasimavoq.

Suleqatigiinnissamut nalunaarut 2002-meersoq Nunat Avannarliit Killiit Siunnersuisoqatigiiffiannit nunallu ataasiakkaat naalakkersuisuinit saqqummiunneqarsimasoq nunat avannarliit killiit suleqatigiinnerannut alloriarnerusimavoq pingaaruteqarlunnartoq. Suleqatigiinneq nunat suleqatigiinnermut naalakkersuisa kiisalu Nunat Avannarliit Killiit Siunnersuisoqatigiiffiata Siulittaasoqarfiata akornanni ukiumoortumik ataatsimiittarnikkut paasissutissanik akunnermi avitseqatigiittarnikkut pissasoq illuatungeriinnit nalunaarutikkut isumaqatigiissutigineqarsimavoq, tamaanna Nunat Avannarliit Killiit Siunnersuisoqatigiiffiata ukiumoortumik ataatsimiinneranut atatillugu nunani avannarlerni killerni suleqatigiinnermut naalakkersuisuinit kiisalu sammisanut naalakkersuisuinit peqataaffigineqartumik, nunat siunnersuisoqatigiiffiup kaammattuutit aalajangersagaanik malitseqartitsinerat kiisalu nunat

suleqatigiinnerat suleqatigiinnermilu suliassat ingerlaavartut pisariaqalersitaat pillugit nunani suleqatigiinnermut naalakkersuisut ukiumoortumik nassuiaasiortassallutik.

Aammattaaq nunani avannarlerni killerni suliassaqarfinnut naalakkersuisut arlallit akornanni maanna isumaqatigiissuteqarpoq, tamanna ilaatigut suliassaqarfinnut peqqissutsimut kiisalu isumaginninnermut tunngassutilinnut naalakkersuisut suleqatigiinnissamik isumaqatigissuteqarlutik, pilersaarutit malillugit suleqatigiissutit pingaarnerit ukiumoortumik ataatsimiinnertigut tigussaasunngortinniarlugit piffissalersorniarlugillu oqallisigineqartarlutik. Nunat Avannarliit Killiit Siunnersuisoqatigiiffiat 2019-imi 20-milu ukiuunerani siunnersuisoqatigiiffiup kaammattuutit aalajangersagaanik iluarsartuusseqqippoq. Anguniagassatut nalunaarutigineqartoq tassaasimavoq Nunat Avannarliit Killiit Siunnersuisoqatigiiffiata kaammattuutit aalajangersagaanik erseqqinnerulersitsinissaq, siunnersuisoqatigiiffiup sulianik ingerlatseriaasianik kiisalu siunnersuisoqatigiiffiup naalakkersuisullu akornanni kaammattuutit aalajangersakkat pillugit oqaloqatigiinnermik pitsanngorsaanissaq.

Nunat Avannarliit Killiit Siunnersuisoqatigiiffiata Gjógvimi ulloq 28. januar 2020-mi ataatsimiinnerani iluarsartuusseqqilluni suliaqarneq oqallisigineqarpoq, eqimattakkaarluni sulinnermut malittuanillu ataatsimut oqallisiginninnermut inerniliinermullu ualeq tamakkerlugu atorneqarluni.

Tamatumani inerniliussat pingaarnerit takutippaat Nunat Avannarliit Killiit Siunnersuisoqatigiiffiannit ataqatigiissaarisooqarnissaanik kissaateqartoqartoq, tamanna siunnersuisoqatigiiffimmi namminermit kiisalu assersuutigalugu kaammattuutit aalajangersakkanik suliaqarnermi atuutsitsilernermilu Naalakkersuisunik sulianillu ilisimasalinnik suleqateqarnermi. Sulianik ingerlatsinerit erseqqinnerulernerat kaammattuutitullu aalajangersakkat siunnerfeqarnerulernerat tamatuma nassatarissavaa.

Nunat Avannarliit Killiit Siunnersuisoqatigiiffianni isumaqartoqarpoq nunani avannarlerni killerni naalakkersuisut akornanni ataqatigiissaarinerup nukittorsarneqarnera kaammattuutit aalajangersakkanik suliaqarnerup piareersarneqartarnerannut kiisalu Nunat Avannarliit Killiit Siunnersuisoqatigiiffianni suleqatigiissutinut allanut aamma tapertaalluarsinnaasoq.

Taamaammat nunani ataasiakkaani nunat avannarliit suleqatigiinnerannut naalakkersuisut, minnerpaamik ukiumut ataasiarlutik nalinginnaasumik ataatsimeeqatigiittarnissamik isumaqatigiissuteqarlutik suleqatigiinnerminnik annertusaaqqullugit NAKS'imit kaammattorneqarput.

Naalakkersuisut pineqartut ukiumoortumik ataatsimiinneranni nunani avannarlerni suleqatigiinnermi qulequttat nunanut avannarlernut killernut soqutiginaateqartut oqallisigineqartassallutik. Nunat Avannarliit Killiit Siunnersuisoqatigiiffiata kaammattuutit aalajangersagaasa naalakkersuisunullu qinnuteqaataasa oqallisigineqartarnissaat ukiumoortumik ataatsimiittarnernik taakkunanga siunertaassaaq. Aamma oqaloqatigiinnikkut isumassarsianik, ilisimasanik assingusunillu avitseqatigiinnissaq pingaarnertut siunertaassaaq. Naalakkersuisut tassaassapput ataatsimiinnissamut tulluarnepaamik piffissaliissussat, ataatsimiinnerilli nunani avannarlerni suleqatigiinnermut naalakkersuisut Nunat Avannarliit Siunnersuisoqatigiiffiata katersuunnerani uteqqiattumik ataatsimeeqatigiittarnerannut atatillugit pisarsinnaalluarput, tassanimi suleqatigiinnermut naalakkersuisut aamma Nunat Avannarliit Killiit Siunnersuisoqatigiiffiata siulittaasoqarfianik ataatsimeeqateqartarput. Suleqatigiinnermut naalakkersuisut taakkulu atorfilittaasa Nunat Avannarliit Siunnersuisoqatigiiffiata katersuunnerani Nunat Avannarliit Killiit Siunnersuisoqatigiiffiata siulittaasoqarfianik ukiumoortumik ataatsimeeqateqannginnerminni suliaminnik ataqatigiissaariniaarlutik ilaatigullu Nunat Avannarliit Killiit Siunnersuisoqatigiiffiata kaammattuutit aalajangersagaanut qinnuteqaataanullu akissutissaminnik ataqatigiissaariniaarlutik ataatsimeeqatigiissinnaanerata tamatuma nassatarisinnaavaa. Tamanna siunnersuisoqatigiiffiup naalakkersuisullu akunnerminni oqaloqatigiinnerannik nukittorsaataassaaq Nunallu Avannarliit Killiit Siunnersuisoqatigiiffiata kaammattuutit aalajangersagaasa qinnuteqaataasalu kiisalu naalakkersuisut akissutaasa ukiumoortumillu nassuiaataasa imarisaannik sunniuteqarnerulersitsillunilu nukittorsaataalluni. Nunanit avannarlernit killernit Nunat Avannarliit Ministerrådianni suleqatigiinnermut ataatsimiititaliamut ilaasortaaitat, nunani ataasiakkaani nunanut allanut naalakkersuisoqarfinni atorfilittaasut qaffasissumik inissimasut ataatsimiinnernik piareersaateqarnissaq ataqatigiissaarinissarlu ingerlaavartuq akisussaaffigissavaat.